

Wixinee Labsii Magaalota Mootummaa Naannoo Oromiyaa Hundeessuuf Bahe Lakk. 65/1995 Irra Deebiin Fooyyessuuf Bahe, Labsii Lakk _____ / 2008

Magaalotni Naannichaa haala ammayyaatiin sadarkaa isaanii eeganii giddugala misoomaa, industirii, teeknoolojii, odeeffannoo fi gabaa akkasumas jireenyaaf mijataa akka ta'an gochuun barbaachisaa ta'ee waan argameef;

Qajeeltoowwan Heera Mootummaa irratti mirga ummanni sadarkaa adda addaatti ofiin of bulchuuf qabu bu'uura gochuudhaan magaalotni haala itti caaseffaman, aangoo fi hojjiin isaanii itti murtaa'uu tumuun barbaachisaa waan ta'eef;

Magaalotni dandeettii misoomaa ol'aanaa horachuudhaan guddina naannichaa fi fooyya'iinsa jireenya jiraattota isaaniitiif fiduu akka danda'an sirni hojii fi caaseffamni isaanii qajeeltoowwan bulchiinsa gaarii irratti akka hundaa'uu taasisuudhaan haala misooma magaalota Naannichaa ariifachiisuu danda'uu uumuun barbaachisaa ta'ee waan argameef;

Magaalota keessatti tajaajilli saffisaan haala itti kennamu mijeesuudhaan, hirmaannaa fi fayyadamummaan ummataa dabalee, nageenyaa fi tasgabii amansiisaa magaalaa keessatti dhugoomsuu fi ol'aantummaa seeraa mirkaneessuuf akka hojjatan dandeessisuuf akkasumas walitti hidhamiinsa magaalaa fi magaalaa, magaalaa fi baadiyyaa cimsuudhaan misooma ariifachiisaa ummanni sadarkaa sadarkaan irraa fayyadamu mirkaneessuuf;

Akkaataa Heera Mootummaa Naannoo Oromiyaa fooyya'ee bahe Labsii Lak. 46/1994 keewwata 49 (3) (a) tiin kan kanatti aanu labsameera.

Kutaa Tokko

Tumaalee Waliigalaa

1. Mata Duree Gabaabaa

Labsiin kun "Labsii Magaalota Mootummaa Naannoo Oromiyaa Hundeessuuf Bahe Lak. 65/1995 Irra Deebiin Fooyyessuuf Bahe Labsii Lakk. _____ / 2008" jedhamee waamamuu ni danda'a.

2. Hiika

Akkaataan jechichaa hiika biroo kan kennisiisuuf yoo ta'e malee labsii kana keessatti:

- 1) "Naannoo" jechuun naannoo Oromiyaa ti.
- 2) "Magaalaa" jechuun magaalaa qaamni seerummaa magaalummaa kennameef jechuu dha.
- 3) "Bulchiinsa Magaalaa" jechuun magaalaa qaamni seerummaa kennameef ta'ee Mana Maree mataa isaa, Mana Maree Bulchiinsaa fi qaama aangoo abbaa seerummaa kan qabu ta'ee sadarkaa magaalaa; Magaalaa Rijjiyoo Poolisii, Magaalaa Muummaa, Magaalaa Ol'aanaa, Magaalaa Jiddu Galeessaa fi Magaalaa Guddattuutti hundeeffame jechuu dha.

- 4) **“Caffee”** jechuun Caffee Mootummaa Naannoo Oromiyaa ti.
- 5) **“Mana Maree Bulchiinsa Mootummaa Naannoo”** jechuun qaama raawwachiiftuu ol’aanaa Bulchiinsa Mootummaa Naannichaa jechuu dha.
- 6) **“Mana Maree”** jechuun sadarkaa magaalaa fi qaxanaatti filannoo ummataatiin qaama bakka bu’aa ta’ee hundeeffame jechuu dha.
- 7) **“Mana Murtii”** jechuun mana murtii idilee sadarkaa bulchiinsa magaalaatti hundeeffamu ta’ee dhimmoota manneen murtii idileetti ilaalamanii fi dhimmoota magaalaa irratti qaama aangoo abbaa seerummaa qabu jechuu dha.
- 8) **“Mana Maree Bulchiinsaa”** jechuun qaama rawwachiiftuu ol’aanaa sadarkaa Bulchiinsa Magaalaa, sadarkaa Aanaa Magaalaa yookiin sadarkaa Qaxanaa Magaalaatti hundeeffamu jechuu dha.
- 9) **“Heera”** jechuun Heera Mootummaa Naannoo Oromiyaa jechuu dha.
- 10) **“Kantiibaa”** jechuun abbaa aangoo ol’aanaa qaama raawwachiisaa Bulchiinsa Magaalaa jechuu dha.
- 11) **“Hojii Gaggeessaa Magaalaa”** jechuun raawwachiisaa tajaajiloota mana qopheessaa magaalichaa jechuu dha.
- 12) **“Tajaajila Mana Qopheessaa”** jechuun tajaajila bishaanii fi dhangala’aa, ijaarsaa fi suphaa daandii, ittisa balaa ibiddaa fi balaa tasaa, misooma lafa magaalaa, qulqullinaa fi miidhagina magaalaa, tajaajila idilee jiraattotaaf kennamanii fi tajaajila biroo magaalichi murteessu dabalatee magaalichaan raawwatamu jechuu dha.
- 13) **“Biiroo”** jechuun Biiroo Industirii fi Misooma Magaalaa Oromiyaa jechuu dha.
- 14) **“Magaalaa Rijjiyoo Poolisii”** jechuun kallattiiwwan adda addaatiin giddugala misoomaa ta’uun magaalotni naannawa isaanii jiran akka guddatan kan gargaaran jechuu dha.
- 15) **“Aanaa Magaalaa”** jechuun bulchiinsa magaalaatti aanee qaama gurmaa’insa caasaa magaalaa ta’ee mana maree bulchiinsaa kan qabuu fi aangoo qaama raawwachiisaa sadarkaa isaatti qabaachuun kan hundeeffamee fi kan sadarkaan Aanaa kennameef jechuu dha.
- 16) **“Ganda”** jechuun bu’uura labsii kanaatiin magaalota naannichaa keessatti Mana Maree, qaama raawwachiisaa fi mana murtii hawaasummaa mataa isaa kan qabuu fi caasaa bulchiinsaa magaalaa isa jalqabaa jechuu dha.
- 17) **“Tumaa Magaalaa”** jechuun seera dirqisiisaa magaalaa bahu ta’ee, magaalaa dhimmi ilaalu keessatti kan hojiiarra oolu jechuu dha.
- 18) **“Hojii Mootummaa”** jechuun hojiiwwan seektaroota mootummaatiin bulchiinsa magaalaa keessatti hojjataman jechuu dha.

19) "Dambii Kabachiisaa" jechuun aangoon qaama seera kabachiisaa biroof kenname akkuma eegametti ta'ee, aangoon magaalotaaf kenname ilaalchisee qaama seera kabachiisuu hundeeffame jechuu dha.

20) "Waldaa Magaalaa" jechuun waldaalee magaalotni qaama seerummaa qaban walitti dhufanii faayidaa misoomaa waliiniif ijaaran jechuu dha.

3. Ibsa Koornayaa

Labsii kana keessatti jechi koornayaa dhiiraatiin ibsame dubartiis ni dabalata.

4. Daangaa Raawwatiinsaa

Labsiin kun Magaalota Naannichaa qaamni seerummaa kennameef kamiyyuu irratti raawwatiinsa ni qabaata.

Kutaa Lama

Hundeeffama, Sadarkaa, Aangoon FI Hojii Magaalotaa

5. Sadarkaa fi Itti Waamama Magaalotaa

1) Magaalotni naannichaa sadarkaa guddinaa irra gahanii fi ulaagaa bahu irratti hundaa'uu sadarkaalee armaan gadiitti kan qoodaman ta'a:

- (a) Bulchiinsa Magaalaa Rijjiyoo Poolisii;
- (b) Bulchiinsa Magaalaa Muummee;
- (c) Bulchiinsa Magaalaa Ol'aanaa;
- (d) Bulchiinsa Magaalaa Giddu Galeessaa;
- (e) Bulchiinsa Magaalaa Guddattuu;
- (f) Magaalaa Mana Qopheessaa;
- (g) Magaalaa mana Qopheessaa Guddattuu.

2) Sadarkaan magaalota naannichaa ulaagaalee armaan gadiitti tumaman irratti hundaa'uu kan madaalamu ta'a:

- (a) Galii magaalichi sassaabu;
- (b) Baay'ina Ummataa;
- (c) Bal'ina Lafa Magaalichaa fi
- (d) Giddugaleessummaa teessoo bulchiinsaa ta'uu.

3) Raawwiin keewwata kana keewwata xiqqaa 2(a-d) ilaalchisee Dambii bahuun kan murtaa'aa ta'a.

4) Itti waamamni Magaalaa Rijjiyoo Poolisii, Magaalaa Muummee fi Ol'aanaa Mana Mar magaalichaa fi Waajjira Pirezidaantii Naannichaatiif ta'a.

5) Itti waamamni Magaalaa Giddu Galeessaa fi Guddattuu Mana Maree magaalichaa fi Waajjii Bulchiinsa Godinaatiif ta'a.

- 6) Itti waamamni Magaalaa Mana Qopheessaa fi Mana Qopheessaa Guddattuu Waajjira Bulchiinsa Aanaatiif ta'a.
 - 7) Magaalotni naannichaa sadarkaalee keewwata kana keewwata xiqqaa 1 (a-g) jalatti tarreeffaman sadarkaa isaanii fi deeggarsa taasifamuu qabu adda baasuun haalli deeggarsi itti taasifamu Mana Maree Bulchiinsa Mootummaa Naannichaatiin kan murtaa'u ta'a.
 - 8) Gandoota baadiyyaa amala magaalummaa qabatanii ulaagaa magaalummaa osoo hin guutin hafan, magaalota teessoo Aanaa ta'uun tajaajilaa jiranii fi sadarkaa magaalota naannichaa Labsii kana keessatti tumame keessatti hin hammatamne ilaalchisee Biiron akka magaalaa mana qopheessaa guddattuutti lakkaa'uun qaama serummaa kennuun aangoo fi hojii isaanii murteessuu ni danda'a.
 - 9) Keewwata kana keewwata xiqqaa 2 (a-d) jalatti kan tumame jiraatuyyuu Manni Maree Bulchiinsa Mootummaa Naannichaa haala addaatiin ulaagaa armaan olitti tumame guutuun osoo hin barbaachiisin sadarkaa magaalaa murteessuu fi ulaagaa madaallii sadarkaa magaalotaa dabalataa baasuu ni danda'a. Raawwiin isaa Dambii bahuun kan murtaa'u ta'a.
 - 10) Akkaataan magaalaa kamiyyuu sadarkaa irra jirurraa sadarkaa itti aanutti guddatu yookiin gadi itti bu'an, akkasumas yeroon turtii sadarkichaa fi dhimmootni biroo Dambii bahuun kan murtaa'u ta'a.
 - 11) Bulchiinsi Magaalotaa sadarkaa Bulchiinsa Magaalaa Riijiyoo Poolisii fi Bulchiinsa Magaalaa Muummee irra jiran, ulaagaa Aanaa Magaalaaaf kaa'ame kan guutan yoo ta'e caaseffama Aanaa magaalaa hundeeffachuu ni danda'u. Tarreeffamni isaa dambii bahuun kan murtaa'u ta'a.
 - 12) Guddinni sadarkaa magaalaa kamiyyuu kan kennamu Biiron dhiyaatee Mana Maree Bulchiinsa Mootummaa Naannichaatiin yoo murtaa'e qofa dha.
- 6. Qaama Seerummaa Argachuu**
- 1) Jiraattotni iddoo murtaa'aa tokko keessa jiraatan karaa bakka bu'oota isaanii gaaffii qaama seerummaa magaalummaa Biiroof dhiyeessuu ni danda'u;
 - 2) Gaaffiin akkaataa keewwata kana keewwata xiqqaa 1'n dhiyaatu barreeffamaan ta'ee ulaagaalee armaan gadii guutuu qaba:
 - (a) Daangaa iddoo jireenyaa iyyattootaa kan agarsiisu ragaa qaama mootummaa dhimmi ilaaluun kenname;
 - (b) Bal'ina iddichaa fi baay'ina ummatischaa;
 - (c) Ibsa waa'ee sochii hawaas-diinagdee fi tajaajila bakka sanatti argamuu;
 - (d) Iyyannoon dhiyaatu ummata filachuuf gahumsa qabu bakka sana jiraatu keessaa 25% oliin kan deeggarama ta'uu isaa ragaa ibsu;
 - (e) Pilaaniin bu'uuraa magaalichaaf hojjatamee fi qaama aangoo qabuun mirkanaa'e;
 - (f) Ulaagaalee biroo qajeelfama Biiron baasuun ibsaman.

- 3) Biiron gaaffii qaama seerummaa magaalummaa argachuuf dhiyaate qorachuun ji' a sadii keessatti murteesse waraqaa ragaa qaama seerummaa sadarkaa magaalichaa ibsu ni kenna.
- 4) Gaaffiin qaama seerummaa magaalummaa dhiyaate fudhatama kan dhabe yoo ta'e sababni isaa ibsamee qaama gaaffii dhiyeesse yookaan bakka bu'oota isaaniif deebiin barreeffamaan kennamuu qaba.
- 5) Biiron qaama seerummaa magaalummaa akka kennamu yammuu murteessu waraqaa ragaa qaama seerummaa magaalichaaf ni kenna.
- 6) Ragaan qaama seerummaa magaalotaa yammuu kennamu sadarkaan isaanii waliin ibsamuu qaba.

7. Bu'aa Qaama Seerummaa Argachuu

Akkaataa labsii kanaatiin magaalaa qaama seerummaa magaalummaa argate kamiyyuu mirga maqaa isaatiin waamamuu, aangoo fi hojii labsii kana keessatti ibsaman raawwachuu, waliigaltee seenuu, qabeenya horachuu, himachuu fi himatamuu ni danda'a.

8. Qaama Seerummaa Haquu

- 1) Qaamni seerummaa magaalummaa kenname haqamuu yookiin mulqamuu kan danda'u magaalichi qaama seerummaa kennameef eeguun ulaagaa magaalaa tokkoo eeguun fi gonfachuun kan hin danadeenye yoo ta'e qofa dha.
- 2) Qaama seerummaa magaalummaa haquun yookiin mulquun dura Biiron deeggarsa barbaachisaa kennuu qaba.
- 3) Qaamni seerummaa magaalummaa kennamee ture kan haqame yookiin mulqame yoo ta'e mirga fi dirqamni magaalichi duraan qabu qaama magaalichi duraan itti waamamaa tureef kan darbu ta'a. Tarreeffamni isaa dambii bahuun kan murtaa'u ta'a.

9. Walitti Makamiinsa Magaalotaa

- 1) Kenna tajaajilaa fi hojiiwwan bulchiinsaatiif mijaa'aadha jedhamee kan itti amaname yoo ta'e fedhii fi waliigaltee jiraattotaa irratti hundaa'uun qorannoo Biiron gaggeessu irratti hundaa'uun magaalota daangaa waliirra jiran walitti makuun ni danada'ama.
- 2) Walitti makamiinsi magaalotaa Biiron dhiyaatee Mana Maree Bulchiinsaa Mootummaa Naannichaatti dhiyaatee mirkanaa'uu qaba. Murtiin kennamus qaamni kamiyyuu hojiirra oolchuuf dirqama qaba.

10. Jijjiirraa Maqaa Magaalaa

- 1) Jijjiirraan maqaa magaalaa kan taasifamu fedhii fi waliigaltee jiraattota magaalichaa irratti hundaa'ee Mana Maree magaalaa dhimmichi ilaallatutti dhiyaatee yoo murtaa'e dha.
- 2) Gaaffiin akkaataa keewwata kana keewwata xiqqaa 1 tiin Mana Maree Magaalichaatiin mirkanaa'ee Mana Maree Bulchiinsaa Mootummaa Naannichaatti dhiyaatee ragga'uu qaba.

11. Aangoo fi Hojii Magaalotaa

- 1) Magaalaan kamiyyuu aangoo fi hojiiwwan armaan gadii ni qabaata:
 - (a) sochiwwan hawaasummaa, diingadee fi siyaasaa irratti hawaasa maagilchaa haala hirmaachiseen murteessuu fi guddina argamu irraa jiraataan magaalichaa akka fayyadamu ni taasisa;
 - (b) Bulchiinsi gaariin akka mirkanaa'u ni hojjata; sirna iftoominaa fi itti gaafatamummaa qabu ni diriirsa;
 - (c) Karoora hawaasummaa, diinagdee fi baajata magaalichaa ni qopheessa; hojiirra ni oolcha;
 - (d) Baajata magaalichaa akkaataa seeraatiin ni bulcha; galii gibiraa fi tajaajilaa akkaataa seeraatiin ni murteessa; walitti ni qaba; akka walitti qabamu ni taasisa; misoomaa fi guddina magaalichaaf ni oolcha;
 - (e) Murtii mootummaa naannichaa yookiin Mana Maree Magaalichaa irratti hundaa'uun maallaqa liqeffachuu ni danda'a;
 - (f) Manneen magaalicha jala jiran bu'uura seeraatiin ni bulcha;
 - (g) Humna namaa magaalichaa akkaataa seera bulchiinsa hojjatoota mootummaa naannichaatiin ni bulcha;
 - (h) Akkaataa seeraatiin qaamolee Mootummaa, abbootii qabeenyaa dhuunfaa, waldaalee hawaasaa fi magaalota biroo waliin walitti dhufeenya ni uuma; waliigaltee ni seena;
 - (i) Heera Naannichaa keewwata 40 keewwata xiqqaa 8 jalatti kan tumame akkuma eegametti ta'ee, faayidaa ummataatiif barbaachisaa ta'ee yammuu argamu beenyaa wal-madaalu dursa kaffaluun qabeenya dhuunfaa faayidaa ummataatiif ni oolcha;
 - (j) Labsii kanaa fi seerota biroo bu'uura godhachuun waliigaltee irratti hundaa'uun magaalota biyya keessaa yookiin biyya alaa waliin obbolummaa yookiin michummaa ni uuma;
 - (k) Ijaarsi magaalaa keessatti gaggeeffamu qulqullinaa fi bareedina, akkasumas pilaanii magaalichaa karaa eegeen hojjatamuu isaa ni mirkaneessa;
 - (l) Lafa maastar pilaanii magaalatiin hammatame yookiin daangaa magaalaa keessa jiru ni misoomsa; ni bulcha;
 - (m) Dambii fi qajeelfama qophaa'u irratti hundaa'uun namoota mana jireenyaa ijaarachuuf waldaan gurmaa'uu barbaadan ni galmeessa; ragaa qaama seerummaa ni kenna; manneen jireenyaa qusannoon ijaaraman ilaalchisee qorannaa ni gaggeessa; yammuu hayyamamu hojiirra ni oolcha;
 - (n) Waliigaltee bittaa fi gurgurtaa, kiraa manaa fi manneen wabiin qabaman ni galmeessa;
 - (o) Jiraattotaaf tajaajila saffisaa, bu'aa qabeessaa fi haqa qabeessa ta'e ni kenna; keessumaayyuu, tajaajila bu'uuraalee misoomaa kan akka daandii, bishaan, humna ibsaa, bilbilaa fi geejjiba ummataa ni hojjata; ni suppha; akka hojjatamuu fi suphamu ni taasisa;

- (p) Hojii eegumsa naannoo kan akka balfa dhabamsiisuu, manca'ina naannoo too'achuu, sarara dhangala'aa diriirsuu fi kan kana fakkaatan ni raawwata;
- (q) Tajaajila hawaasummaa kan akka hojii barnootaa, fayyaa ittisa irratti xiyyeeffate, ittisa dhibee HIV/AIDS, tajaajila ambuulaansii, tajaajila galmeessa ragaalee adda addaa, bakka qalmaa, bakka awwaalchaa, gabaa fi kan kana fakkaataan ni kenna;
- (r) Tajaajila ispoortii, tiyaatira, bakka aaragalfannaa, bashannanaa, mana kitaabaa, muuziyeemii fi kan kana fakkaatu irratti ni hojjata;
- (s) Tajaajila eegumsa nageenya ummataa, tajaajila haqaa, ittisa balaa ibiddaa, too'annoo dawaa (qorichaa) fi nyaataa fi kan kana fakkaatan ni kenna;
- (t) Maanguddoota, qaama miidhamtootaa fi daa'imman haadhaa fi abbaa hin qabne haala ittiin kunuunsa argatan ni mijeessa;
- (u) Hojiiwwan sochii investimantii saffisiisan, toftaa galii maddisiisanii fi sagantaa hiyyummaa hir'isuu hojiirra oolchuun hojiiwwan misooma magaalichaa fi jireenya ummatichaa fooyyessuuf gargaaran ni hojjata;
- (v) Pilaanii magaalichaa ni qopheessa; akka qophaa'u ni taasisa; ni raggaasa ni fooyyessa; hojiirra ni oolcha;
- (w) Tajaajilootni adda addaa haala saffinaa fi qulqullina qabuun akka kennamuu fi teessoon hojjattootaa haala salphaa ta'een akka beekamu hojimaata ammayyaawaa ta'e ni diriirsa;
- (x) Magaalota keessatti bakka hawwata turiizimii ni gurmeessa, hambaalee seenaa fi meeshaaleen aadaa sirnaan eeegamuu isaanii ni hordofa; ni mirkaneessa;
- (y) Ummata magaalichaa sadarkaa sadarkaan gurmeessuun hirmaannaa jiraattootni magaalaa misooma irratti qaban akka guddatu ni hojjata; fayyadamummaan hawaasaa, keessumaayyuu, hirmaannaa fi fayyadamummaan dubartootaa fi dargaggootaa akka guddatu ni hojjata.
- 2) Tajaajiloota magaalotaan jiraattoota isaaniitiif kennan yookiin dhiyaatan mijaa'ummaa isaa filmaama keessa galchuun guutumaan guutuutti yookiin gartokkeen qaamolee Mootummaa biroo waliin yookiin abbootii qabeenyaa dhuunfaa waliin yookiin hirmaannaa hawaasaatiin yookiin filannoo birootiin akka kennamu taasisuun ni danda'ama.

Kutaa Sadii

Gurmaa'insaa fi Sirna Gaggeessummaa Magaalaa

Sadarkaa Aangoo Bulchiinsaa

- 1) Akkaataa sadarkaa magaalichaa irratti hundaa'uun sadarkaan aangoo bulchiinsa magaalotaa kan armaan gaditti tumame ta'a:
- a) **Bulchiinsa Magaalaa;** bulchiinsa magaalaa aangoo guutuu qabu;

- b) **Aanaa magaalaa:** caasaa bulchiinsa magaalatti aanee hundeeffamuu fi qaama aangoo qaama raawwachiisaa qofa qabu;
 - c) **Ganda:** sadarkaa bulchiinsaa isa jalqabaa fi Aanaa magaalatti aanee hundeeffamu.
- 2) Bulchiinsa sadarkaa magaalatti aanee caasaan Aanaa magaalaa kan hundeeffamu magaalota sadarkaa Riijiyoo Poolisii fi Muumnee qofa keessatti dha.
 - 3) Magaalota sadarkaa Riijiyoo Poolisii fi Muummeen ala jiran keessatti caasaan bulchiinsa magaalatti aanee gurmaa'uu Qaxanaadha.

13. Gurmaa'insa Qaamota Mootummaa Sadarkaa Magaalaa

Gurmaa'insi qaamota mootummaa magaalotaa akkaataa armaan gadiitiin ta'a:

- 1) **Mana Maree:** Qaama seera baasu;
- 2) **Mana Maree Bulchiinsaa:** Qaama seera raawwachiisu;
- 3) **Mana Murtii:** Qaama aangoo abbaa seerummaa;

14. Gurmaa'insa Qaama Hooggansaa Sadarkaa Magaalaa Gadii

- 1) Gurmaa'insi sadarkaa magaalaa gadi jiru akkaataa sadarkaa magaalichaa fi bu'uura labsii kanaatiin sadarkaa kennamu irratti kan hundaa'u ta'ee, Aanaa magaalaa fi Gandaan kan hundeeffamu ta'a.
- 2) Gurmaa'insi qaama hooggansaa sadarkaa Aanaa magaalaa qaama raawwachiisaa qofaan kan gurmaa'u ta'ee aangoo sadarkaa magaalaa irraa gadi bu'uuf kan hojiirra oolchu qaama raawwachiisaa gurmaa'insa hooggansa magaalatti aanee jiru ta'a.
- 3) Sadarkaa Aanaa magaalatti caasaan mana murtii akkaataa barbaachisummaa isaatti murtii mootummaatiin kan gurmaa'u ta'a.

15. Gurmaa'insa Qaamolee Mootummaa Sadarkaa Gandaa

Gurmaa'insi qaamota mootummaa sadarkaa Qaxanaa akkaataa armaan gadiitiin ta'a:

- 1) **Mana Maree:** Qaama seera baasaa Gandaa;
- 2) **Mana Maree Bulchiinsaa:** Qaama raawwachiisaa ol'aanaa Gandaa;
- 3) **Mana Murtii Hawaasummaa:** Qaama aangoo abbaa seerummaa Gandaa;

16. Sirna Gaggeessummaa Magaalaa

Sirni gaggeessummaa magaalaa sirna **"Mana Maree-Kantiibaa"** ta'ee kan hojiirra oolu magaalota Mana Maree mataa isaanii qaban qofa keessatti ta'a. Tarreeffamni isaa dambii bahuun kan murtaa'u ta'a.

7. Mana Maree Magaalaa

- 1) Filannoon idilee Mana Maree Magaalaa waggaa shan shaniin kan gaggeeffamu ta'a.
- 2) Miseensota Mana Maree magaalaa bakka lamatti walqixatti kan hin hiramne ta'ee miseensonna isaas sadarkaa magaalaa fi gandaatti jiraattota magaalichaatiin karaa bilisa, kallattii fi akkaataa kenna sagalee iccitiitiin kan filataman ta'u.
- 3) Baay'inni miseensota Mana Maree magaalaa akkaataa seera baay'ina miseensota mana maree aanaa, maagaalaaa fi gandaa naannichaa murteessuuf baheen kan raawwatamu ta'a.
- 4) Bulchiinsa magaalotaa Mana Maree mataa isaanii qaban keessatti baay'inni jiraattoota saba Oromoo xiqqaa ta'ee yoo argame Caffeen Mootummaa Naannoo Oromiyaa baay'ina ummata Oromoo baay'ina ummata biroo waliin wal bira qabee ilaaluun barcuma Mana Maree Magaalichaa keessatti 51% akka eegamuuf taasisuu ni danda'a. Tumaan kun kan Mana Maree sadarkaa gandaa irrattis raawwattiinsa ni qabaata.
- 5) Bulchiinsa magaalotaa Mana Maree mataa isaanii qaban keessatti Gandoota baadiyyaa magaalichaa daangessaniif barcuma Mana Maree magaalichaa keessatti 20% ni eegamaaf; bakka bu'oonni Gandaa yookiin Gandoota baadiyyaa magaalichaa daangessanis filatamtoota keessaa Mana Maree Gandaa yookiin Gandootaatiin bakka bu'u.
- 6) Namni filannoo Mana Maree magaalaa dorgomuuf dhiyaatu seera filannoo biyyoolessaatiin ulaagaalee ibsaman kan guutuu fi afaan hojii naannichaa (Afaan Oromoo) kan danda'u ta'uu qaba.
- 7) Magaalaa Mana Qopheessaa fi Magaalaa Mana Qopheessaa Guddattuutiif Mana Maree magaalaa addaa of danda'e hundeessuun osoo hin barbaachiisin akka gandaatti (gandootaatti) lakkaa'uun Mana Maree Aanichaa keessatti hirmaannaa ni qabaatu.

8. Aangoo fi Hojii Mana Maree Magaalaa

Manni Maree Magaalaa aangoo fi hojii armaan gadii ni qabaata:

- 1) Labsii kana keewwata 10 jalatti aangoo fi hojiin magaalotaaf kenname hojiirra ni oolcha; hojiirra akka oolu ni taasisa;
- 2) Keewwata kana keewwata xiqqaa 1 jalatti kan tumame akkuma eegametti ta'ee, Manni Maree Magaalaa aangoo fi hojiiwwan armaan gadii ni qabaata:
 - (a) Imaammata, tarsiimoo fi fi seerota mootummaa Naannichaatiin bahan haala walsimuun dhimmota magaalaa irratti tumaalee magaalaa (city ordinance) ni baasa;
 - (b) Karoora hawwas-diinagdee fi baajata magaalichaa kantiibaan dhiyaatuuf xiinxalee ni mirkaneessa; raawwii isaas ni hordofa;
 - (c) Akkaataa seeraatiin gibiraa fi kaffaltii tajaajilaa ni murteessa; sassaabamuu isaas ni mirkaneessa;
 - (d) Lafa magaalichaa keessatti argamu bu'uura seeraatiin ni bulcha;

- (e) Gurmaa'insa caasaa bulchiinsa magaalichaa ni raggaasisa; caaseffamaa fi sirna raawwii hojii qaamolee raawwachiiftuu magaalichaa ni murteessa; raawwii isaanis ni hordofa;
- (f) Koreewwan dhaabbataa fi yeroo ni hundeessa;
- (g) Afyaa'ii Mana Marichaa miseensota keessaa ni filata; haala hojii isaas ni murteessa;
- (h) Kantiibaa magaalaa miseensota Mana Marichaa keessaa ni filata; muudama isaas ni mirkaneessa;
- (i) Itti Aanaa Kantiibaa magaalaa miseensota Mana Marichaa keessaa yookiin alaa ni filata; muudama isaas ni mirkaneessa;
- (j) Sadarkaa magaalichaa irratti hundaa'uun Mana Maree Bulchiinsa magaalichaa ni hundeessa; yaada Kantiibichi dhiyeessu irratti hundaa'uun baay'ina miseensota Mana Marichaa ni murteessa; muudama miseensota Mana Maree Bulchiinsaa Kantiibichaan dhiyaateef ni raggaasisa; haala hojii isaanis ni murteessa;
- (k) Pilani magaalichaa ni raggaasisa; hojirra ooluu isaas ni hordofa;
- (l) Safartuuwwan raawwii hojii fi galmaawwan bara karoora qopheessuudhaan hojiiwwan xiinxalee murtii ni kenna;
- (m) Miseensota isaaf dambii naamusaa baasuudhaan raawwii isaas ni hordofa;
- (n) Gabaasa raawwii hojii yeroo yeroodhaan jiraattotaaf ni dhyeessa.

19. Bara Hojii fi Itti Waamama Mana Maree Magaalaa

- 1) Barri hojii Mana Maree Magaalaa waggaa Shan ta'a.
- 2) Itti waamamni Mana Maree magaalaa ummata isa filatee fi Caffee Naannichaatiif ta'a.

20. Sirna walgahii Mana Maree Magaalaa

- 1) Yaa'iin idilee Mana Maree magaalaa ji'a saditti al tokko kan adeemsimafmu ta'ee, Afyaa'iin yookiin Kantiibaadhaan yookiin Miseensota Mana Marichaa keessaa harki $\frac{1}{3}$ fii yoo gaafatan walgahii ariifachiisaan waamamuu ni dnada'a.
- 2) Yaa'ii mana marichaa kami irrattiyuu miseensota mana marichaa keessaa walakkaa ol yoo argaman walgahichi guutuu ta'a.
- 3) Murtiin mana marichaa miseensota yaa'ii irratti argaman keessaa sagalee caalmaan kan darbu ta'a.
- 4) Tasgabbi magaalichaaf yookiin haamilee ummataaf yookiin mirga miseensota biroo eeguuf barbaachisaa ta'ee yoo argame malee yaa'iin mana marichaa ummataaf banaa ni ta'a.
- 5) Manni Marichaa haalli hojii isaa fi murtiin isaa kan itti qabamu galmee ni qabaata.

21. Muudama Afyaa'ii

- 1) Afyaa'iin Mana Marichaa miseensota Mana Marichaa keessaa kan filatamu ta'ee itti waamamni isaa Mana Marichaatiif ta'a.
- 2) Barri hojii Afyaa'ichaa bara hojii Mana Marichaa ta'a.

3) Keewwata kana keewwara xiqqaa 2 jalatti kan tumame jiraatuuyyuu sababoota armaan gadiitti tumamaniin Afyaa'iin osoo barri hojii isaa hin xumuramin dura hojii isaa irraa ka'uu ni danda'a:

- (a) Fedhii isaatiin hojicha yoo gadi dhiise;
- (b) Itti gaafatamummaa isaa irraa Mana Marichaan yoo dhorkame;
- (c) Miseensa Mana Marichaa ta'uun isaa yoo addaan cite; yookiin,
- (d) Itti gaafatamummaa isaa qixa sirriin bahuu yoo dadhabe.

4) Kan keewwata kana keewwata xiqqaa 3 (a)-(d)tti tumame kan hojiiirra oolu mana magaalichaatti dhiyaatee yoo mirkanaa'e qofaadha.

5) Tarreeffamni raawwii keewwata kana keewwata xiqqaa 3 (a-d) Dambii ittiin bulmaata Manni Maree magaalichaa baasuun kan murtaa'u ta'a.

22. Aangoo fi Hojii Afyaa'ii Mana Maree Magaalaa

Afyaa'iin Mana Marichaa aangoo fi gahee hojii armaan gadii ni qabaata:

- 1) Yaa'ii Mana Marichaa ni waama; ajandaa marii ni qopheessa; walagahii Mana Marichaa ni gaggeessa; koreewwan Mana Marichaa ni qindeessa;
- 2) Dhimma bulchiinsaa Mana Marichaa ni hooggana; tarkaanfii naamusaa Manni Marichaa miseensota irratti murteesse ni raawwachiisa; magaalicha bakka bu'a;
- 3) Tooftaa Manni Marichaa koree dhaabbii fi yerootiin itti gurmaa'u ni diriirsa; ni karoorsa; hojiiirra oolmaa isaa ni hordofa;
- 4) Karoora lenjii dandeettii raawwachiisummaa miseensota Mana Marichaa cimsu ni baasa; qaamolee raawwachiiftuu dhimmi ilaallatu waliin ni raawwachiisa;
- 5) Murtiiwwan Mana Marichaa qaama dhimmi ilaallatuuf akka darbu ni taasisa; raawwii isaa ni hordofa;
- 6) Qunnamtii qaama sadaffaa waliin taasifamu irratti Mana Marichaa bakka ni bu'a;
- 7) Hojiiwwan Mana Marichaatiin kennamuuf kan biroo ni raawwata.

23. Muudama fi Itti Waamama Kantiibaa fi Itti Aanaa Kantiibaa

- 1) Kantiibaan magaalaa miseensota Mana Marichaa keessaa ta'ee, Mana Marichaatiin kan moggaafamu ta'a.
- 2) Itti Aanaa Kantiibaan magaalaa miseensota mana marichaa keessaa yookii alaa kan filatamu ta'ee; Mana Maree magaalichaatiin kan muudamu ta'a.
- 3) Itti waamamni Kantiibaa magaalaa Rijjiyoo Poolisii, Magaalaa Muummee fi Ol'aanaa Mana Maree Magaalichaa fi Pirezidaantii Naannichaatiif ta'a.
- 4) Itti waamamni Kantiibaa magaalaa Giddugaleessaa fi Guddattuu Mana Maree magaalichaa fi Bulchaa Godinaatiif ta'a.

- 5) Itti waamamni Hojii Gaggeessaa Mana Qopheessaa fi Mana Qopheessaa Guddattuu Waajjira Bulchaa Aanaatiif ta'a.
- 6) Itti waamamni Itti Aanaa Kantiibaa, Kantiibaa magaalichaatiif ta'a.
- 7) Barri hojii kantiibichaa bara hojii mana marichaa ta' a.
- 8) Keewwata kana keewwata xiqqaa 7 jalatti kan tumame jiraatuyyuu sababoota armaan gadiitiin Kantiibaan barri hojii isaa osoo hin xumuramin dura hojii isaa irraa ka'uu ni danda'a:
 - (a) Fedhii isaatiin hojicha yoo gadi dhiise;
 - (b) Itti gaafatamummaa isaa irraa Mana Marichaan yoo dhorkame;
 - (c) Miseensa Mana Mariichaa ta'uun isaa yoo addaan cite; yookiin
 - (d) Ittigaafatamumma isaa qixa sirriin bahuu yoo dadhabe.
- 9) Tarreeffamni raawwii keewwata kana keewwata xiqqaa 8 (a-d) Dambii ittiin bulmaata Manni Maree magaalichaa baasuun kan murtaa'u ta'a.

24. Aangoo fi Gahee Hojii Kantiibaa

Kantiibichi aangoo fi gahee hojiiwwan armaan gadii ni qabaata:

- 1) Hoogganaa fi hojii raawwachiisaa ol'aanaa magaalichaa ta'uun ni tajaajila;
- 2) Magaalicha keessatti heeraa fi sirni heeraa, akkasumas seerri kabajamuu isaa ni mirkaneessa;
- 3) Imaammata, tarsiimoo fi seerotaa naannichaa fi akka biyyaatti bahanii fi murteewwan Mana Maree magaalichaa fi Mana Maree Bulchiinsa Mootummaa Naannichaatiin murtaa'an ni raawwata; ni raawwachiisa; gabaasa raawwii hojii yeroo yeroon Mana Marichaa fi Waajjira Pirezidaantiif ni dhiyeessa;
- 4) Miscensota Mana Maree Bulchiinsaa filachuun Mana Maree magaalichaaf dhiyeessuun muudama isaanii ni raggaasisa, hojii isaanii bu'uura seeraatiin ni hooggana;
- 5) Dandeettii fi ogummaa hooggansaa irratti hundaa'uudhaan hojii gaggeessaa magaalaa filachuun Mana Maree magaalichaaf dhiyeessuun muudama isaa ni raggaasisa;
- 6) Tajaajilli magaalaa saffisaa, bu'a qabeessaa fi haqa qabeessa ta'e hojii gaggeessaa magaalatiin dhiyaachuu isaa ni mirkaneessa;
- 7) Ayyaana akka naannoo, biyyaa fi ummataa kabajamu irratti magaalicha bakka ni bu'a;
- 8) Karooraa fi baajata magaalichaa Mana Maree Bulchiinsaa waliin mari'achuun qopheessee Mana Maree magaalichaatiif ni dhiyeessa; yammuu ragga'u hojirra ni oolcha; akka hojirra oolu ni taasisa;

- 9) Ummatni karoora, baajata akkasumas raawwii hojii fi dhimmoota biroo magaalicha ilaallatan irratti yaada akka kennuu danda'u qaamolee dhimmi ilaallatu waliin mari'achuun waltajjii ni qopheessa;
- 10) Hojiiwwan biroo Mana Marii magaalichaa, Waajjira Pirezindaantii fi akkaataa sadarkaa magaalichaatiin Waajjiraalee Bulchiinsaa sadarkaa sadarkaan jiran irraa kennamuuf ni hojjata.

25. Aangoo fi Gahee Hojii Itti Aanaa Kantiibaa

Itti Aanaa Kantiibaan aangoo fi gahee hojii armaan gadii ni qabaata:

- 1) Bakka Kantiibaan hin jirretti bakka bu'ee ni hojjata;
- 2) Hojiiwwan biroo Mana Maree Magaalichaa fi Kantiibichaan kennamuuf ni hojjata.

26. Mana Maree Bulchiinsa Magaalaa

- 1) Manni Maree bulchiinsa magaalaa namoota miseensota Mana Maree magaalichaa ta'an yookiin kan miseensa hin ta'in keessaa hundaa'uu ni danda'a;
- 2) Baay'inni Mana Maree Bulchiinsa Magaalotaa yaada kantiibaan dhiyeessu irratti hundaa'uun Mana Maree Magaalichaatiin kan murtaa'u ta'a. Tarreeffamni isaa Dambu bahuun kan murataa'u ta'a;
- 3) Miseensotni Mana Maree Bulchiinsa Magaalaa murtii kennaniif ittigaafatamummaa dhuunfaa fi waliinii ni qabaatu;
- 4) Barri hojii Mana Maree Bulchiinsaa bara hojii Mana Marichaa ta'a;
- 5) Itti waamamni Mana Maree Bulchiinsaa Kantiibichaa fi Mana Maree Magaalichaatiif ta'a.

27. Aangoo fi Hojii Mana Maree Bulchiinsa Magaalaa

Manni Maree Bulchiinsa magaalaa Aangoo fi Hojii armaan gadii ni qabaata:

- 1) Seerota, murtiiwwanii fi sadarkaalee Mootummaa Naannichaan bahanii fi murtiiwwanii fi sadarkaalee Mana Maree magaalichaan bahan hojiirra ooluu isaanii ni hordofa; ni mirkaneessa; heeraa fi sirna heeraa, akkasumas seera ni kabajichiisa;
- 2) Hojii mootummaa magaalicha keessatti hojjatamu ni gaggeessa; ni qindeessa;
- 3) Baajata magaalichaa ni qopheessa; yammuu ragga'u hojiirra ni oolcha;
- 4) Tarsiimoo misooma hawaasummaa fi diinagdee magaalichaa, akkasumas sagantaalee hojii ni qopheessa; yammuu ragga'u ni raawwachiisa;
- 5) Hojiiwwan biroo Mana Maree fi Kantiibaa magaalichaan kennamuuf ni rawwata.

28. Muudamaa fi Itti Waamama Hoji Gaggeessaa fi Itti Aanaa Hoji gageessaa

- 1) Hojii gaggeessaan Magaalaa Riijiyoo Poolisii, Magaalaa Muummee, Magaalaa Ol'aanaa, Magaalaa Giddugaleessaa fi Magaalaa Guddattuu dandeettii ogummaa fi gahumsa gaggeessummaa qabuun madaalamee Kantiibaa magaalichaatiin dhiyaatee Mana Maree magaalachiin kan muudamu ta'a;

- 2) Magaalotni sadarkaa Rijjiyoo Poolisii fi Muummaa Itti Aanaa Hoji gaggeessaa tokkoo ol qabaachuu ni danda'u;
- 3) Hojii gaggeessaan Magaalaa Mana Qopheessaa fi Magaalaa Mana Qopheessaa Guddattuu dandeettii ogummaa fi gahumsa gaggeessummaa qabuun madaalamee Bulchaa Aanaatiin dhiyaatee Mana Maree Aanaatiin kan muudamu ta'a;
- 4) Itti aanaa hojii gaggeessaa magaalaa Hojii gaggeessaa Kantiibaa magaalatiin dhiyaatee Mana Maree Bulchiinsa Magaalichaatiin kan muudamu ta'a;
- 5) Itti waamamni Hojii Gaggeessaa Magaalaa Kantiibichaaf ta'a;
- 6) Itti waamamni Itti Aanaan Hojii gaggeessaa, Hojii gaggeessaa magaalatiif ta'a;
- 7) Hojii Gaggeessaan Magaalaa Miseensa Mana Maree Bulchiinsaa ti.

29. Aangoo fi Gahee Hojii Hoji- Gaggeessaa Magaalaa

Hojii Gaggeessaan magaalaa aangoo fi gahee hojii armaan gadii ni qabaata:

- 1) Raawwachiisaa hojii tajaajilaa magaalaa ta'uun ni tajaajila;
- 2) Hojii tajaajiloota Mana Qopheesa magaalaa ni gaggeessa; ni qindeessa;
- 3) Sadarkaalee fi haalawwan raawwii kenniinsa tajaajilaa agarsiisan qopheessee Kantiibichaaf ni dhiyeessa; yeroo ragga'anis raawwii isaanii ni mirkaneessa;
- 4) Imaammatni, seerotnii fi sadarkaaleen Mootummaa Naannichaan bahan akkasumas murtiiwwan Mana Maree magaalichaa damee tajaajila magaalaa keessatti hojiirra ooluu isaa ni mirkaneessa;
- 5) Koree Manajimantii ittigaafatamtoota qaamolee tajaajiloota magaalaa kan of keessaa qabu dhaabee ni gaggeessa;
- 6) Ittigaafatamtoota qaamolee tajaajila magaalaa ni ramada;
- 7) Hojjattoota qaamolee tajaajiloota mana qopheessaa magaalicha keessa hojjatan bu'uura seeraatiin ni qaxara; ni bulcha; ni gaggeessa;
- 8) Hundeeffama qaamolee tajaajiloota mana qopheessaa dhiyeessanii fi filannoo toftaalee dhiyeessii tajaajila adda addaa ilaalchisee Kantiibichaaf yaada ni dhiyeessa; yammuu murtaa'u hojiirra ni oolcha;
- 9) Safartuuwwanii fi qajeelfamoota dhiyeessii tajaajilaa qindeessee Kantiibichaaaf ni dhiyeessa; yammuu mirkanaa'u hojiirra ni oolcha;
- 10) Baajataa fi sagantaa hojii bara karoora qaamolee tajaajiloota mana qopheessaa qopheessee kantiibichaaaf ni dhiyeessa; yammuu ragga'u hojiirra ni olcha;
- 11) Tajaajiloota mana qopheessaa ilaalchisee iyyata jiraattotaan dhiyaatu iftoominaan ni keessummeessa; gaaffilee dhiyaataniif deebii hatattamaa ni kenna;

12) Tajaajiloota mana qopheessaa ilaalchisee gabaasa raawwii hojii fi faayinaansii yeroo yeroon Kantiibichaaf ni dhiyeessa.

30. Aangoo fi Gahee Hojii Itti Aanaa Hoji-Gaggeessaa Magaalaa

Itti Aanaa Hoji-gaggeessaan aangoo fi gahee hojii armaan gadii ni qabaata:

- 1) Itti aanaa hoji-gaggeessaa fi qindeessaa damee ta'ee ni hojjata;
- 2) Bakka hojii gaggeessaan magaalaa hin jirretti yookiin hojii isaa hojjachuu hin dandeenyeetti hoji-gaggeessaa bakka bu'uun ni hojjata;
- 3) Hojii damee isaa fi hojii adda bahee Hojii gaggeessaa magaalatiin kennamuuf ni hojjata.

31. Hundeeffamaa fi Itti Waamama Waajjiraalee Seektara Magaalotaa

Waajjiraaleen seektaraa fi manneen hojii tajaajiloota adda addaa kennan bu'uura sadarkaa magaalichaatiin kan hundeeffaman ta'ee akkaataa dhimmichaatiin itti waamamni isaanii kantiibaadhaaf yookiin qaama olii isaan itti waamaniif ta'uu ni danda'a. Raawwiin isaa Dambii bahuun kan murtaa'u ta'a.

32. Hundeeffama Aanaa Magaalaa

- 1) Aanaan magaalaa gurmaa'insaa bulchiinsa magaalatti aanu ta'ee ummata 10,000 hanga 20,000 gahuun gurmaa'uu ni danda'a. Tarreeffamni isaa dambii bahuun kan murtaa'u ta'a;
- 2) Aanaan magaalaa Qaxanaa 3 - 4 qabaachuu ni danda'a;
- 3) Aanaan magaalaa itti waamamni isaanii ummataa fi bulchiinsa magaalichaaf ta'a;
- 4) Aanaan magaalaa keessatti tajaajila saffisaa fi gahumsa qabu kennuuf caasaa mootummaa of danda'e ni qabaata;
- 5) Aanaa magaalaa keessatti qaama raawwachiiftuu dhaabbiin hojjatu kan hundeeffamu ta'ee, gaheen hojii isaas gahee hojii Mana Maree Bulchiinsa Magaalichaaf labsii kanaan keewwata 26 jalatti kenname ni qabaata.

33. Muudamaa fi Itti Waamama Hojii Gaggeessaa Aanaa Magaalaa

Hojii Gaggeessaan Aanaa magaalaa Riijiyoo Poolisii fi Magaalaa Muumnee koree hojii raawwachiiftuu Aanaa magaalatiin dhiyaatee Kantiibaa magaalatiin kan muudamu ta'a.

34. Aangoo fi Gahee Hojii Hoji-Gaggeessaa Aanaa Magaalaa

Hojii gaggeessaan aanaa magaalaa magaalaa Riijiyoo Poolisii fi Magaalaa Muumnee itti waamamni isaa hojii gaggeessaa magaalatiif ta'ee aangoo fi gahee hojii armaan gadii ni qabaata.

- 1) Walgahii Mana Maree Magaalaa keessatti sagalee malee ni hirmaata;
- 2) Hojii tajaajiloota magaalotaa ni raawwata; ni raawwachiisa;

- 3) Hojii Gaggeessaa magaalaa waliin ta'uun Aanaa magaalaa fi Qaxanaa magaalaa keessatti tajaajiloota magaalatiif filannoowwan hojii adda addaa akka hojiirra oolan yaada ni dhiyeessa; yammuu hayyamame hojiirra ni oolcha;
- 4) Hojjattoota mana qopheessaa Aanaa magaalaa akkaataa seeraatiin ni bulcha;
- 5) Hojii gaggeessaa magaalaa hayyamsiisuudhaan koree hooggansa Aanaa magaalaa ni hundeessa;
- 6) Raawwii hojii isaa ilaalchisee hojii gaggeessaa magaalatiif gabbasa hojii ni dhiyeessa;
- 7) Hojii gaggeessaa magaalaa waliin ta'uun karoora hojii Aanaa magaalaa ni qopheessa; yammuu mirkanaa'es hojiirra ni oolcha;
- 8) Aanaa magaalaa keessatti tajaajiloota magaalaa dhimmoota ilaallatan irratti murtee ni kenna;
- 9) Hojii gaggeessitoota Qaxanaa, hojii gaggeessaa Magaalaa mirkaneessisuun dandeettii ogummaa irratti hundaa'ee ni muuda; ni bulcha; ni gaggeessa;
- 10) Hojiilee dabalataa biroo hojii gaggeessaa magaalatiin kennamuuf ni raawwata.

35. Hundeeffama Qaxanaa Magaalaa

- 1) Gandi magaalaa labsii kanaan caasaa bulchiinsaa jalqabaa ta'ee magaalota Mana Maree qabani fi hin qabne keessatti ni hundeeffama;
- 2) Gandi magaalaa caasaa aangoo mootummaa Mana Maree, Mana Maree Bulchiinsaa fi Mana Murtii hawaasummaatiin kan gurmaa'u ta'a;
- 3) Gandi magaalaa tokko baay'ina ummata 2,000 - 10,000 qabuun hundaa'uu ni danda'a. Tarreeffamni isaa dambii bahuun kan murtaa'u ta'a;
- 4) Gandi magaalaa qaama dambii kabachiisu ni qabaata.

36. Aangoo fi Hojii Qaxanaa

Gandi magaalaa aangoo fi hojii sadarkaa Aanaa magaalati kenname qooddachuun akkaataa dhimmichaatiin sadarkaa isaatti kan qabaatu ta'a. Tarreeffamni isaa Dambii bahuun kan murtaa'u ta'a.

37. Muudama Hoji Gaggeessaa Ganda

Hojii gaggeessaan ganda magaalaa dandeettii ogummaa fi gahumsa gaggeessummaa qabuun madaalamee Dura taa'aa gandaatiin dhiyaatee Mana Marii gandaatiin ni muudama.

Kutaa Afur

Hundeeffama Mana Murtii Idilee fi Mana Murtii Hawaasummaa Magaalaa

38. Hundeeffama Mana Murtii Idilee

- 1) Magaalotni sadarkaa sadarkaan jiran mana murtii qaama aangoo abbaa seerummaa qabu kan qabaatan ta'ee, Manni Murtichaa magaalota Mana Maree of-danada'e qaban keessatti akkaataa barbaachisummaa isaatti kan hundeeffamu ta'a;

- 2) Manni Murtii magaalaa akkaataa Labsii kanaatiin hundeeffamu gaaffii Manni murtii Waliigalaa dhiyeessuun qorannoo irratti hundaa'uun ta'a.
- 3) Haalli caaseffama manneen murtii kanaa akkaataa caaseffamaa fi hojimaata Manneen Murtii Naannichaatiin ta'a.
- 4) Akkaataa keewwata kanaatiin dhimmoonni magaalaa manneen murtii sadarkaa bulchiinsa magaalotaatti ilaalaman dambii bahuun kan murtaa'u ta'a.

39. Hundeeffama Mana Murtii Hawaasummaa

- 1) Dhimmoota dambii darbuu magaalatti raawwataman ilaalaa kan murteessu Manni murtii hawaasummaa sadarkaa ganda magaalatti ni hundeeffama;
- 2) Itti waamamni mana murtii hawaasummaa Ganda Mana Maree Ganda magaalattiif ta'a;
- 3) Aangoo fi hojiin Labsii manneen murtii hawaasummaa Gandaattiif kenname manneen murtii hawaasummaa gandoota magaalotaatti hundeeffaman irratti raawwatiinsa ni qabaata.

40. Hundeeffama Dambii Kabachiisaa

Tokkoon tokkoon Aanaa magaalaa fi Ganda qama dambii kabachiisaa lakkoofsi isaa akkaataa Aanaa magaalichaa yookiin Gandichaatiin garaagarummaa qabaatuun ni hundeeffatu. Tarreeffamni isaa Dambii keessoo Manni Maree Magaalichaa baasuun kan murtaa'u ta'a.

Kutaa Shan

Walitti Dhufeenya Magaalotni Jiraattotaa fi Qaamolee Biroo Waliin Qabaatan

41. Walitti Dhufeenya Jiraattota Waliin Jiraachuu Qabu

- 1) Walitti dhufeenyi magaalotni jiraattota waliin qabaatan qajeeltoo bu'uuraa Heera mootummaa "aangoon kamiyyuu uummata irraa madda" jedhu irratti kan hundaa'e dha.
- 2) Miseensota Mana Maree magaalaa kan filatuu fi aangoo fi itti gaafatamummaa qaban irraa kan kaasu ummata magaalichaa qofa dha. Ummatni magaalichaa bakka bu'oota Mana Maree Bulchiinsa magaalattiif filatan deebisanii waamuu ni danda'u.

42. Hirmaannaa Ummataa Mirkaneessuu

- 1) Jiraattotni magaalichaa, waldaaleen ummataa fi dameewwan dhuunfaa, sagantaa hojii, wixinee baajataa, yaada pirojeektii, gabaasa raawwii hojii fi faayinaansii fi odiitii bara karooraa irratti akka mari'atanii fi yaada kennan taasifamuu qaba;
- 2) Bulchiinsi magaalaa yoo xiqqaate ji'a sadiitti al tokko walatajjii jiraattotni magaalichaa, waldaaleen ummataa fi dameewwan dhuunfaa dhimmoota adda addaa magaalichaa ilaallatan irratti mari'achuun yaada itti kennuu danda'an mijeessuu qaba;
- 3) Akkaataa barbaachisummaasaati walgahiin ummataa magaalichaan waamamuu ni danda'a;
- 4) Jiraattotni magaalichaa boordiiwwan yookiin koreewwan dhimma magaalichaa ilaalchisee hundeeffaman keessatti akka hirmaatan magaalichi toftaa uumuu fi haala mijeessuun hirmaannaa ummataa jajjabeessuu qaba;

komuunni Naannoo Oromiyaa fi
a misoomaa magaalotaaf ni hirmaa,
komaa fi guddina magaalotaaf haala mijaa'aa ni uuma.
magaalotaa fi baadiyyaa cimsuudhaaf magaalotni bulchiinsa
itti koree waliini hundeesaan dhimma waliini irratti
danda'u.
naannoo isaanii jira walun daangaa irratti
da'argachuu qabu qaama

5) Bulchiinsi magaalichaa gaaffilee fi komii ummatni dhiyeessuuf deebii saffisaa kennuuf dirqama qaba.

Naannoo Oromiyaa fi

?

43. Walitti Dhufeenya Magaalaa fi Qaxanaa Magaalaa Waliin Jiraachuu Qabu

- ✓ 1) Aangoon, hojii fi caaseffamni keessoo Ganda magaalaa ^{qaxanaa} qajeelfama alwaalta'iinsaa bu'uura kan godhatu ta'ee tarreeffamni isaa Dambii bahuun kan murtaa'u ta'a;
- 2) Manni Maree Ganda dhimmoota hojii misooma Gandichaa wajjin walqabate irratti bulchiinsa magaalichaaf yookiin bulchiinsa Aanichaaf yaada dhiyeessuu ni danda'a;
- ? 3) Dhimmoonni hojii Mootummaa Federaalawaa yookiin Naannichaa ta'anii armaan dura Ganda magaalaatin hojjatamaa turanii fi labsii kanaan aangoo fi hojii magaalaa ala kan ta'an waliigaltee mootummaan naannichaa fi bulchiinsi magaalichaa uumaniin hojjatamuu ni danda'u.

magaalotni isaan kan?
Kutaa Jaha

Walitti Dhufeenya Magaalotaa FI Bulchiinsa Mootummaa Naannichaa

44. Qajeeltowwan Waliigalaa

- 1) Walitti dhufeenyi magaalotaa fi Bulchiinsa Naannoo, bilisummaa magaalonni seeraan qaban bu'uureffachuun itti waamamni fi ittigaafatamummaan Naannichaaf qaban walta'iinsa, qindoominaa fi waldeeggarsaan hojjachuu fi ol'aantummaa seeraa irratti kan hundaa'e dha;
- ? 2) Walitti dhufeenyi Bulchiinsaa Naannichaa fi magaalotaa ^{Naannoo Oromiyaa} karoora qindoomina qabuu fi yaa'insa odeeffannoof haala kan miyeessu ta'uu qaba.

45. Haala Mootummaan Naannichaa fi Magaalotni Waldeeggaruun Itti Hojjatan

maale jechuudha?

- 1) Magaalaa aangoo fi hojii isaa raawwachuuf qaamolee yookiin dhaabbilee Bulchiinsa Naannichaa waliin qindoominaan wali-wajjin yookiin waliigaltee uumuudhaan qooda fiudhaachuu ni danda'a;
- 2) Barbaachisaa ta'ee yoo argame Mootummaan Naannichaa ^{Naannoo Oromiyaa} magaalotni keessatti qaamolee naannoo dhaabuu yookiin hojii naannoo hojjachuu ni danda'a.

46. Seerotaa fi Sadarkaalee Baasuu fi Raawwachiisuu

- 1) Mootummaan Naannichaa seeraa fi sadarkaalee barbaachisaa ta'an baasuun magaalonni aangoo fi hojii isaanii akka raawwataniif deeggarsa tekinikaa barbaachisaa ni kenna;
- ? 2) Magaalonni raawwatiinsa seerotaa fi sadarkaaleen kabajamuu isaa mirkaneessuuf ittigaafatammummaa ni qabaatu;
- ? 3) Murtiiwwan magaalotaan kennamanii fi sirni hojimaataa magaalotaan diriiran imaammata, tarsiimoo, sagantaalee fi seerota akka naannoo fi biyyaatti bahaniin kan walsiman ta'uu qabu.

47. **Haala Mootummaan Naannichaa Magaalota Itti Deeggaru**

- 1) Firojeektota murtaa'an raawwachiisuuf deeggarsi Mootummaa Naannichaan kennamu akkuma eegametti ta'ee, Mootummaan Naannichaa waldorgommii fi haqummaa bu'uureeffachuudhaan deeggarsa misoomaa magaalotaaf ni kenna;
- 2) Mootummaan Naannichaa misoomaa fi guddina magaalotaaf haala mijaa'aa ni uuma.

48. **Koree Waliinii Hundeessuu**

- 1) Walitti hidhamiinsa diinagdee magaalotaa fi baadiyyaa cimsuudhaaf magaalotni bulchiinsa Aanaa isaan daangessu waliin koree waliinii hundeessuun dhimma waliinii irratti qindominaan hojjachuu ni danda'u;
- 2) Waldhabiinsi Magaalaa fi Ganda baadiyyaa naannoo isaanii jiru waliin daangaa irratti uumamu hanga danda'ametti marii qaamolee lamaaniin furmaata argachuu qaba; qaama lamaaniin furmaata itti kennuun kan hin danda'amne yoo ta'e Mana Maree Bulchiinsa Mootummaa Naannichaatiin murtiin dhumaa kan itti kennamu ta'a.

49. **Haala Magaalotni Gabaasa Itti Dhiyessan**

- 1) Magaalotni gabaasa raawwii hojii fi faayinaansii kan kurmaanaa fi waggaa qaama itti waamamaniif dhiyeessuu qabu; gabaasa oditii akkuma barbaachisummaa isaatti qaamuma magaalli itti waamamuuf ni dhiyeessu;
- 2) Qaamni gabaasni dhiyaateefis sirrummaa gabaasichaa mirkaneessuudhaaf gabaasa dhiyaateef yeroo yeroon gamaaggamuun duubdeebii kennuu qaba.

50. **Diigamuu Mana Maree Magaalaa**

- 1) Gocha Heera mootummaa naannichaas ta'e kan mootummaa Federaalaa balaa irra buusu raawwatameera jedhee yoo itti amane yookiin gochaa cimaa nageenya yookiin mirga namummaa sarbu kana raawwatame yoo ta'ee fi too'achuun kan hin danda'amne yoo ta'e, akkasumas gochi faayidaa jiraattotaa miidhu raawwatame jedhee yoo itti amane Manni Maree magaalaa akka diigamu Caffeen murteessuu ni danda'a;
- 2) Bu'uura keewwata kana keewwata xiqqaa 1 jalatti tumameen Manni Maree magaalichaa kan diigamu yoo ta'e bulchiinsi yeroo Mana Maree Bulchiinsa Mootummaa Naannichaatiin ni moggaafama; yeroo Caffeen Naannichaa murteessu keessatti filannoon haaraan akka adeemsifamu qaama dhimmi ilaallatu waliin haalli ni mijaa'a; tarreeffamni isaa Dambu bahuun kan murtaa'u ta'a.

Kutaa Torba

Waa'ee Bulchiinsa Faayinaansii fi Baajata Magaalotaa

51. **Bara Bajataa**

Barri baajataa magaalotaa bara bajataa Mootummaa Naannichaa ta'a.

52. **Madda Galii Magaalotaa**

- 1) Galiin magaalotaa maddoota armaan gadii irraa ta'a:

- a) Gibiraa fi taaksii seeraan hayyamamee fi galii tajaajila kennan irraa sassaaban;
 - b) Deeggarsa baajataa mootumaan naannichaa taasisuuf irraa;
 - c) Liqii fi gargaarsa irraa;
 - d) Maddoota galii kan biroo irraa;
- 2) Galii idilee sadarkaa magaalatti sassaabamu kamiyyuu kan magaalotaa ta'ee, haalli bulchiinsi magaalotaa ittiin waldeeggaran dambii bahuun kan murtaa'uu ta'a.
 - 3) Keewwata kana keewwata xiqqaa 2 jalatti kan tumame akkuma jirutti ta'ee, bara baajataa itti aanu irraa eegalee hojirra kan oolu ta'a.
 - 4) Magaalotni hojii Mootummaa Naannichaaf hojjataniif kaffaltii ni argatu;
 - 5) Akkaataa keewwata kana keewwata xiqqaa 1(c)tiin liqii magaalotaan raawwatamuun dura barbaachisumman isaa Mana Maree Bulchiinsa Naannichaatiin murtaa'uu qaba.
 - 6) Liqii magaalotni liqeffatan Mootummaa Federaalaa yookiin Naannichaa irraa, akkasumas qaama faayinaansii seeraan beekamtii qabu irraa ta'ee, liqii haala kanaan argame baasii pirojeektota kaappitaalaaf qofa kan oolu ta'a.
 - 7) Haala liqii fi kaffaltii ilaalchisee tarreeffamni isaa Dambii bahuun kan murtaa'uu ta'a.

53. Sirna Bulchiinsa Faayinaansii fi Galmee Herregaa

- 1) Magaalaan kamiyyuu qabeenya isaa sirnaan gurmeessuu fi bulchuuf aangoo fi ittigaafatamummaa ni qaba;
- 2) Sirni faayinaansii magaalotaa kamiyyuu sirna faayinaansii mootummaa naannichaa hordofuun kan raawwatamu ta'a;
- 3) Magaalaan kamiyyuu galmee herregaa fi harsahameewwan maallaqaa guutuu fi sirrii ta'e ni qabaatu;
- 4) Magaalotni qophii fi raawwii baajataa irratti gahumsa fooyya'aa akka qabaatan Biroom deeggarsa ni kennaaf.

54. Sirna Gabaasa Faayinaansii

- 1) Kantiibaan gabaasa faayinaansii bulchiinsa magaalichaa waggaatti si'a lama Mana Maree magaalichaaf ni dhiyeessa; ummataafis ifa ni taasisa.
- 2) Hojii gaggeessaa Aanaa Magaalaa, Mana Qopheessaa fi Mana Qopheessaa Guddattuu gabaasa faayinaansii magaalichaa yeroo yeroon Mana Maree Aanaaf ni dhiyeessa; ummataafis ifa ni taasisa.

55. Sirna Odiitii

- 1) Magaalaan kamiyyuu odiitii keessaa ni qabaata;

- 2) Itti waamanni ittigaafatamaa oditii keessaa hoogganaa ol'aanaa mana hojitiif ta'ee, qabeenyi magaalichaa bu'uura dambii faayinaansii ilaallatuun raawwatamuu isaa guyyaa guyyaan hordofuun ni mirkaneessa.

Kutaa Saddeet

Hooggansa Qabeenya Humna Namaa Magaalotaa

56. Qajeeltowwan Waliigalaa

- 1) Qaxarii fi bulchiinsi humna namaa magaalotaa bu'uura seera hojjattoota mootummaa naannichaatiin ta'a;
 - 2) Magaalaan kamiyyuu bu'uura seera hojjattoota mootummaa naannichaatiin humna namaa jiru qaxaruu, bulchuu, aangoo fi gahee hojii tarreessuu, mindaa fi faayidaa murteessuu fi hojiiirraa gaggeessuuf aangoo ni qabaata.
57. Muudamtoota siyaasaan alaa ramaddiin ittigaafatamtootaa fi hojjattoota magaalaa gahumsaa fi hojichaaf barbaachisummaa isaanii irratti hundaa'ee kan raawwatamuu fi qorannoo gahaa irratti hundaa'uu qaba.

58. Raawwattiinsa Seera Hojjattoota Mootummaa Naannichaa

Seerri hojjattoota mootummaa naannichaa hojjattoota tajaajila mana qopheessaa irrattis raawwattiinsa ni qabaata.

Kutaa Sagal

Waa'ee Pilaanii Magaalaa

59. Aangoo Pilaanii Magaalaa Qopheessuu fi Raawwachiisuu

- 1) Magaalaan kamiyyuu pilaanii magaalaa qopheessuu, akka qophaa'u taasisuu, raggaasuu, fooyyessuu fi raawwachiisuuf aangoo ni qabaata;
- 2) Adeemsa qophii pilaanii keessatti magaalotni qajeeltoowwan bu'uuraa, qajeelfamootaa fi sadarkaalee qophii pilaanii naannichaa fi kan mootummaa federaalaa kabajuuf dirqama qabu. Tarreeffamni isaa Dambii bahuun kan murtaa'uu ta'a.
- 3) Keewwata kana keewwata xiqqaa 1 jalatti kan tumame jiraatuyyuu magaalota mana qopheessaa fi mana qopheessa guddatuu keessatti pilaanii raggaasuun aangoo Mana Maree Aanaa ta'a;
- 4) Haalli keewwata kana keewwata xiqqaa 2 irratti ibsame kabajamuu isaa mirkaneessuuf Biiron qaama dhimmi ilaalu waliin pilaanii magaalichaa xiinxaluun akkaataa barbaachisummaa isaatti yaada fooyya'iinsaa itti dabaluudhaan Mana Maree Magaalichaaf yookiin Mana Maree Aanaaf akka dhiyaatu taasisuu ni danda'a.

60. Jirattoota Magaalaa Hirmaachisuu

- 1) Jiraattooni magaalaa qophii fi raawwii pilaanii magaalichaa keessatti sadarkaa kamittuu irratti hirmaachuu fi yaada isaanii kennuuf mirga ni qabu.

- 2) Magaalaan sirnaa fi haala jiraattootni magaalichaa qophii fi raawwii pilaanii magaalaa keessatti ilaalcha isaanii gahumsaan ibsuu fi yaada isaanii kennuu danda'an diriirsuu qaba.

Kutaa Kudhan
Waldaa Magaalotaa

61. Hundeeffama

- 1) Magaalotni naannicha keessatti argaman waldaa magaalota mataa isaanii hundeesuu fi hojimaata isaa keessatti dammaqimaan hirmaachuu ni danda'u;
- 2) Waldichis qaama mootummaa naannichaa dhimmi ilaallatuun galmaa'uun qaama seerummaa argachuu qaba;
- 3) Caaseffamnii fi haalli hojimaata waldichaa dambii hundeeffamaa fi ittiin bulmaata waldichaatiin kan murtaa'u ta'a.

62. Aangoo fi Hojii Waldaa Magaalotaa

Waldaan magaalotaa aangoo fi hojii dambii hundeeffamaa fi ittiin bulmaata waldichaatiin kennameef akkuma eegametti ta'ee, aangoo fi hojii armaan gadii ni qabaata:

- 1) Magaalota gidduu qindoominni, waljijjiirran muuxannoo fi yaadaa akka jiraatu ni hojjata;
- 2) Magaalota bakka bu'uun dhimmoota waliinii irratti yaada wal jijjiiru;
- 3) Leenjii fi deeggarsa meeshaalee miseensota isaaf kennuudhaan dandeettiin raawwachiisummaa magaalaa akka cimuu ni hojjata;
- 4) Biroo waliin mari'achuun waldaalee magaalotaa biyya keessaa fi alaa waliin walitti dhufeenya cimaa ni uuma;
- 5) Hojiiwwan biroo misooma magaalota naannichaa arifachiisan ni raawwata.

Kutaa Kudha Tokko
Tumaalee Adda Addaa

63. Aangoo fi Hojii Biroo

- 1) Aangoo fi hojiin seerota birootiin kennameef akkuma eegametti ta'ee, dhimmoota labsii kana keessatti tumaman, akksumas immaammata, tarsiimoo fi seerota magaalota naannichaa ilaallatan hojiirra ooluu isaanii hordofuu fi mirkaneessuuf aangoo fi ittigaafatamummaa ni qabaata;
- 2) Dhimmoota magaalota ilaallatan ilaalchisee mootummaa naannichaa ni gorsa; qorannoo fi qo'annoo magaalota ilaallatan ni gaggeessa; akka gaggeeffamu ni taasisa; qaama dhimmi ilaallatuuf ni dhiyeessa; yammuu hayyamu hojiirra akka oolu ni taasa;
- 3) Raawwii hojii magaalota Naannichaa ilaalchisee Mootummaa Naannichaaf gabaasa ni dhiyeessa;
- 4) Lafti magaalaa pilaanii magaalaa egeee qusannoo fi faayidaa ol'aanaaf akka oolu qajeelfamoota fi hojimaata ni qopheessa; hojiirra akka oolu ni taasisa; ni too'ata; ni hordofa;

- 5) Deeggarsa teeknikaa fi meeshaalee magaalotaaf barbaachisu, akkasumas dhimmoota dandeettii raawwachiisummaa magaalotaa cimsan ilaalchisee yeroo yeroon qo'anno ni gaggeessa; qaama dhimmi ilaallatuuf ni dhiyeessa; yammuu hayyamamu hojiirra ni oolcha; hojiirra akka oolu ni taasisa;
- 6) Gaaffii qaama seerummaa magalummaa argachuuf jiraattoota irraa dhiyaatu xiinxaluun murtii ni kenna;
- 7) Gaaffii sadarkaa magaalotaa guddisuuf magaalota irraa dhiyaatu simachuun ni xiinxala; yaada murtii Mana Maree Bulchiinsaa Mootummaa Naannichaatiif ni dhiyeessa; yammuu mirkanaa'u hojiirra ni oolcha;
- 8) Magaalotni Naannichaa magaalota biyya keessaa fi alaa waliin walitti dhufeenya akka uumanii fi cimsan ni gargaara;
- 9) Mootummaa naannichaa fi magaalota naannichaa gidduu walitti dhufeenyi hojii gaariin akka jiraatu ni hojjata.

64. Tumaalee Ce'umsaa

- 1) Manni Maree Bulchiinsa Mootummaa Naannichaa haala labsiin kun sadarkaa sadarkaadhaan magaalota adda addaa keessatti raawwatu murteessuu ni danda'a;
- 2) Bu'uura keewwata kana keewata xiqqaa Itiin sadarkaa sadarkaan bulchiinsa magaalaa hanga filannoo itti aanuun miseensonni Mana Maree magaalaa filatamanitti bulchiinsi amma hojiirra jiru akka itti fufan taasifamuu ni danda'a;
- 3) Labsiin kun ragga'uun dura caasaan bulchiinsaa hojiirra ture hanga magaalotni Naannichaa akkaataa labsii kanaan sadarkaan isaanii mururtaa'utti kan itti fufan ta'a;
- 4) Keewwata kana keewwata 23(1) jalatti kan tumame akkuma eegametti ta'ee, hanga filannoon Mana Maree bulchiinsa magaalaa itti aanu gaggeeffamutti mogaasni fi muudamni Kantiibaa bulchiinsa magaalotaa akkaatuma jiruun kan itti fufu ta'a.

65. Mirgaa fi Dirqama Dabarsuu

Labsiin kun ragga'uun dura mirgaa fi dirqamni magaalotni qaban bu'uura labsii kanaatiin kan itti fufu ta'a.

66. Aangoo Dambii fi Qajeelfama Baasuu

- 1) Labsii kana raawwachiisuuf Manni Maree Bulchiinsa Mootummaa Naannichaa dambii baasuu ni danda'a;
- 2) Labsii kanaa fi Dambii Labsicha raawwachiisuuf bahu raawwachiisuuf Biroon qajeelfama baasuu ni danda'a.

67. Secrota Raawwatiinsa Hin qaabrne

- 1) Labsii, dambii, qajeelfamotni fi barmaatileen hojii labsii kanaan walfaallessan kamiyyuu dhimmoota labsii kanaan hammataman irratti raawwatiinsa hin qabaatan;
- 2) Labsiin Bulchiinsa Naannoo Magaalaa Mootummaa Naannoo Oromiyaa Hundeessuuf Bahe Lak. 65/1995 fi fooyya'insa isaa Labsii Lak. 116/1998 labsii kanaan haqamanii jiru;
- 3) Labsii Qaama raawwachiiftuu Mootummaa Naannoo Oromiyaa Irra Deebiin Hundeessuu fi Aangoo fi Hojii Isaanii Murteessuuf Bahe Lakk 163/2003 keewwata 61 keewwata xiqqaa 1, 2, 3, 4, 5 labsii kanaan haqamaniiru.

68. Yeroo Labsiin kun Hojiirra Itti Oolu

Labsiin kun guyyaa Magalata Oromiyaa irratti maxxanfamee bahe irraa eegalee hojiirra kan oolu ta'a.

Finfinnee

Guyyaa _____, Bara 2008

Muktaar Kadir

Pirezidaantii Mootummaa Naannoo Oromiyaa